



道光乙酉年鑄

西夏書事

小峴山房藏板

序

古之爲史舉其大綱堯舜二典是也其後爲編年以
序事迨司馬遷始創紀表書傳之體漢以下承之是
不必大一統之有史也大事書之策小事書之牘侯
國並著其官孟子曰楚謂之檇杌晉謂之乘魯謂之
春秋其義一也然則有守土設官職立功名而畀子
孫者雖異俗偏隅其世系可考治亂可誌典章名物
之可詳賢否善惡之可勸可戒誠有不容泯者矣拓
跋氏漢西羌之別種而見于載籍則自晉建元元年

小峴山房藏板

序

古之爲史舉其大綱堯舜二典是也其後爲編年以序事迨司馬遷始創紀表書傳之體漢以下承之是不必大一統之有史也大事書之策小事書之牘侯國並著其官孟子曰楚謂之檇杙晉謂之乘魯謂之春秋其義一也然則有守土設官職立功名而畀子孫者雖異俗偏隅其世系可考治亂可誌典章名物之可詳賢否善惡之可勸可戒誠有不容泯者矣拓跋氏漢西羌之別種而見于載籍則自晉建元元年

爵拓跋猗盧爲代王始北史魏本紀魏之先出自黃
帝軒轅氏黃帝以土德王北俗謂土爲拓謂后爲跋
遂以爲氏隆安間拓跋稱帝歷晉宋齊梁享國日久
迨高洋族魏子姓遂微間有散處於幽朔間者越三
百三十年而拓跋復興豈其苗裔歟或曰黨項部落
南雜春桑北連吐谷渾其間八姓並強而拓跋氏爲
最當唐季分崩五代擾攘之際而拓跋竊據西土思
恭仁福創肇于前德明元昊鴟張于後結好契丹雄
視中土時而攄誠時而構釁開邊通市奮揚其志而

饗養其欲拓地數千里傳世十餘禩雖以藝祖太宗
之英武僅僅示尊寵申盟約幾有宋之世羈縻之而
已職其故寧夏古羗戎地漢曰朔方晉赫連勃勃所
都山有賀蘭之險水有奢延之廣右達嘉峪左抱榆
林自古西戎必爭之地加以元昊梟獍之雄馭桀驁
之衆人爲之用而威在遠夷立國之由雖曰地利人
事有焉跡其建學校設兵防班爵祿備禮樂文修武
舉儼然西陲一大國矣仿之遼金本無多讓而遼金
有史夏無專書間或散見諸編異同雜出稽古者不

能無憾也雲間吳子西齋讀書三十年尤究心於史
班之學而又韜才遜志不欲以作家自命特輯西夏
書事一書一遵綱目編年之例自唐僖宗中和元年
迄宋理宗寶慶三年三百四十一年中拓跋氏之世
次昭著行事詳析不蔓不支有條有序予奪嚴而採
擇慎洵乎得古良史之遺意焉惜紀載鮮考蒐羅莫
迨不獲具紀表書傳之體辜作者深心多矣雖然先
賢有言曰古史文約而意周近史敘繁而體雜五代
而降辭意兩蔑哀然成書迄無啟發令人展卷思睡
不若存其大凡以昭一國之紀綱風俗不失春秋左
氏之意不猶善歟是則西夏書事一書之不可無而
足與遼金二史相發明雖並垂不朽也可
賜進士及第 誥授通議大夫山東按察使前翰林
院修撰同學弟琢堂石韞玉頓首拜序

論參差河漢海濶以臨王師首漢氣

似蘇士文徵 蕭拜獻蕭大夫山東遊察與前翰林

吳與愆金二史皆疑用編並垂不泯也百六

天之意不啻海濱故前出夏書第一書之不可無而

不特亦其大武以即一國之強弱風俗不夫泰然也

序

馬班改編年為紀傳荀袁又改紀傳為編年自是而
還作者林立古人待作者而傳耶抑作者藉古人而
傳耳然而或傳或不傳異焉者何也大抵言人所已
言則其傳者常少言人所未言則其傳者常多故載
筆者尤貴知所擇焉史部自正史而外僭偽之國類
多譏述阮氏七錄立偽史一門嗣是晉書末附載記
隋志唐六典改稱霸史如吳越春秋越絕書十六國
春秋華陽國志下逮十國記年五國記事江表志南

唐書蜀檮杌三楚新錄吳越備史等書皆與正史相
出入雖瓜分豆剖蠅聲紫色不得比於中朝然其盛
衰興廢之迹治亂得失之故亦未始不足以示鑒戒
資考証也河西李氏自思恭授鉞於中和仁福析珪
於乾化傳至元昊跋扈鴟張僭稱尊號凡十世而降
於蒙古自古偏隅竊據享國傳世固未有若是之歷
年多者考拓跋本党項八部唐書厠諸西域宜也洎
仁福晉封王爵儼然西陲一大國矣乃歐陽氏五代
史仿龍門例撰十世家擯而不與或以是時十國次

第剗夷而西夏方抗衡中國尙未能要其始終且惡
其夜郎自大不予以割符世爵故耶然仁福列傳猶
進之劉守光李茂貞等藩鎮之列則固未嘗夷之也
厥後元人修宋史則竟置西夏於外國曾留從效陳
洪進之不若遂與高麗日本同科遼金二史因之夫
豈歐陽氏進退之意哉其專紀夏事者羅氏夏國世
次久佚王氏西夏事畧卽東都事畧中之夏國傳乃
好事者鈔出別題孫氏夏國樞要已入宋史傳中劉氏
西夏須知訖於神宗之世較之正史反不逮遠甚良

由西夏僻處羗夷華風未染文藝誥牒盡易蕃書國
人卽間有紀載亦莫能辨其文義以故典章闕畧簡
策凋殘縱或散見諸書獲存什一於千百而歲遠則
同異難密事積則起訖易疎誰復從千百年後網羅
放失珠聯而繩貫之是可慨已吾友吳子西齋夙負
儁才淹通羣史思有以自表見而無所藉手也於是
取唐以下各正史之記夏事者參以李氏長編諸家
續通鑑續綱目旁及稗官野乘奏議文集苟可掇拾
補綴無不廣爲搜採以供疏證每年必冠以中朝正
朔用昭大一統之義并附遼金紀元俾易稽考至於
褒誅予奪書法畧仿紫陽疑者闕之蓋其慎也書成
名曰西夏書事西齋殆知所擇者歟殆能言人所不
言者歟嗚呼足以傳矣吾邑自

國朝以來潭西楊氏熟精史學所著五代史志疑遼
金綱目已登秘府近日虞尊湯氏南唐書注取法世
期是皆有史學而知所擇者也其並傳也固宜

道光六年歲在丙戌季夏六月

賜進士出身

誥授朝議大夫廣東高州府知府署

高兼道事愚弟趙逢源宗遠甫頓首拜序

叙

昔聖人作春秋爲史家編年之祖逮馬班創立紀傳古史之法微矣袁陳而降述作紛紛有正史有別史有雜史別史雜史所以詳正史之畧也予友西齋吳君精於史學正史別史靡不討尋所著西夏書事一書蓋補雜史畧也西夏綿延五代終始遼金顧遼金有史夏鮮成書志古者憾焉西齋撫河西陳跡搜拓跋遺文事之不可沒者書之事之不容諱者書之內事必書外事間書之盛衰理亂功罪或大書或特書

月緯年經具有體例余受而讀之竊嘆是書之成其難有三焉元拓克拓修宋遼金史舊有實錄可據不過仍其文而稍爲編次西夏典籍云亡其攻伐禮樂兵刑諸大務僅散見於宋遼諸史及王偁東都事畧李燾通鑑長編於此而鈎索攷稽以成一國紀載難矣哉卽劉溫潤西夏須知孫吳夏國樞要編殘簡斷紕繆紛紜理亂絲而入扣殊費經營於以知西齋之用心勤矣古人著述莫先聚書梁沈約任昉輩並號良史才其藏書各有數萬卷宋司馬光作通鑑所採

書自正史外至三百三十有二種西夏蕃書紀事文義罕明故歷朝一統志陝甘新舊通志綏靈寧夏各州衛志職方失考文獻少徵而儒生力綿購貯家鮮秘藏第籍耳目過閱以爲證援難乎不難乎於以知西齋之見聞博矣且陸翹著鄴中記徐鉉撰江南錄鄭文寶增修江表志以及周羽翀之三楚新錄句延慶之錦里耆舊傳之數人者非生長其國卽身立其朝而或失之誣或失之畧猶未免見嗤君子矧西夏僻處西陲去今五百餘載地偏則見聞失實世遠則

周餘
攷據無從乃網羅散佚貫立條流正其舛訛抒以論
斷使二十一主三百四十餘年之事迹釐然不紊作
者固不知其難讀者亦忘其爲難於以知西齋之才
識實乎不可及已西齋知予有同好每一過從輒以
史學相規摹悉其撰述尙有廿二史金石攷異明史
紀事本末補歷朝名年紀畧明遺雜記諸稿則予之
序是編也亦祇嚆矢之鳴而已道光六年歲次丙戌
仲春中浣弟周郁濱泉南氏拜撰

跋

士生數百載後欲追述數百載以前事備一國之紀
成一家之言若非淹有三長旁通百氏蓋夏乎其難
之西夏與遼金並雄西北享國較長祇以地雜羌戎
蕃書紀事掌故失傳迄今五百餘載文獻無徵成書
罕覩于此而思蒼萃叢殘補前人所未逮夫豈空疎
佔畢之儒所能漫操鉛槧哉余友吳子西齋淵源家
學好爲古文辭中年後尤殫心乙部書嘗以西夏紀
載闕如爲稽古者一憾事乃彙唐以下正史野乘奏

跋

議誌銘搜羅甄錄做紫陽綱目例次第年月考訂異同成西夏書事四十二卷雖于當日之典章制度未必無遺而其世序相承興亡大畧則已瞭如指掌以視魏崔氏之纂十六國宋劉氏之紀十國張氏之蜀檮杌馬胡陸三家之南唐書其時作者去古未遠猶有故老遺文足資采擷者其編輯之難易爲何如也余不敏謬承商榷竊意是書之必傳而以寡聞淺識得挂名簡末其亦與有榮幸也已道光丙戌孟夏婁邑弟許進松南氏跋

跋

儒者讀聖賢書立德立功立言三者俱不朽而言有爲一人之言爲一時之言爲古今共傳之言近世好古之士辭章別集儘多膾炙當時未必盡傳諸久遠以其或爲一人之言或爲一時之言也予從父西齋素精史學制舉外輒以丹槩自娛嘗纂西夏書事四十二卷蓋寒暑十周始蕝厥事嗚呼古謂纂述難纂述於放失之後則尤難西夏事雖散見於宋遼金三史然遼失之誣金失之簡宋則援引稍精亦多罅漏當

時拓克拓輩距夏未遠而諸傳同異乖違已難更僕
數若曠隔數百載後追述遺文搜羅佚事其舛訛當
更何如也西齋從父乃能勾稽載籍抉摘異同佚者
補之繆者糾之使西夏三百餘年理亂興衰燦然如
聚米之在目自非具過人之識用心專而爲日多安
能爲人所難爲也哉是書出當非一人之言一時之
言而足爲古今共傳之言爰僭爲識數語于後姪熊
書舟氏謹跋

參訂姓氏

許進松南 婁邑

馮國柱柘田 四川

周郁濱泉南 青浦

費椿春林 平湖

陳興宗花嶼 青浦

曹相駿雪莊 金山

葉以忠念臺 青浦

徐瑛秋崖 青浦

盛 熙敬齋 嘉善

吳 熊書舟 青浦

西夏書事目錄

第一卷

起唐僖宗中和元年盡梁末帝龍德二年

第二卷

起後唐莊宗同光二年盡周恭帝顯德六年

第三卷

起宋太祖建隆元年盡宋太宗太平興國八

第四卷

年

起宋太宗雍熙元年盡淳化元年

第五卷

起宋太宗淳化二年盡至道元年

第六卷

起宋太宗至道二年盡宋真宗咸平三年

第七卷

起宋真宗咸平四年盡六年

第八卷

起宋真宗景德元年盡三年

第九卷

起宋真宗景德四年盡大中祥符七年

第十卷

起宋真宗大中祥符八年盡宋仁宗天聖五年

第十一卷

起宋仁宗天聖六年盡景祐元年

第十二卷

起宋仁宗景祐二年盡寶元元年

第十三卷

起宋仁宗寶元二年盡是年

第十四卷

起宋仁宗康定元年盡慶歷元年正月

第十五卷

起宋仁宗慶歷元年二月盡二年六月

第十六卷

起宋仁宗慶歷二年七月盡三年六月

第十七卷

起宋仁宗慶歷三年七月盡四年

第十八卷

起宋仁宗慶歷五年盡八年

第十九卷

起宋仁宗皇祐元年盡嘉祐二年

第二十卷

起宋仁宗嘉祐三年盡八年

第二十一卷

起宋英宗治平元年盡四年

第二十二卷

起宋神宗熙寧元年盡三年

第二十三卷

起宋神宗熙寧四年盡五年

第二十四卷

起宋神宗熙寧六年盡元豐三年

第二十五卷

起宋神宗元豐四年盡是年

第二十六卷

起宋神宗元豐五年盡六年

第二十七卷

起宋神宗元豐七年盡宋哲宗元祐元年

第二十八卷

起宋哲宗元祐二年盡五年

第二十九卷

起宋哲宗元祐六年盡紹聖二年

第三十卷

起宋哲宗紹聖三年盡元符元年

第三十卷 晉宗 隆興二年盡元符元年

第三十一卷 起宋哲宗元符二年盡宋徽宗崇寧二年

第三十二卷 晉宗 元祐六年盡隆興二年

第三十三卷 起宋徽宗崇寧三年盡政和五年

第三十四卷 晉宗 政和二年盡正平

第三十五卷 起宋徽宗政和六年盡宣和七年

第三十六卷 起宋欽宗靖康元年盡宋高宗紹興五年

第三十七卷 起宋高宗紹興六年盡十四年

第三十八卷 起宋高宗紹興十五年盡三十二年

第三十九卷 起宋孝宗隆興元年盡乾道七年

第四十卷 起宋孝宗乾道八年盡宋光宗紹熙五年

第四十一卷 起宋寧宗慶元元年盡嘉定元年

第四十卷

起宋寧宗嘉定二年盡十年

第四十一卷

起宋寧宗嘉定十一年盡十六年

第四十二卷

起宋寧宗嘉定十七年盡宋理宗紹定五年

雲間劉貢九鐫

西夏書事凡例

一 霸國有史晉唐以來述作紛紛載籍極博宋有天
 下幾三百年西夏遼金並雄西北而遼金有史夏
 鮮專書緣其地連沙磧人半羌夷元昊自造蕃書
 以紀國事國亡之後文義莫辨遂至掌故失傳宋
 遼金三史有附傳而弗詳廣成 謬輯是編雖無當
 于參稽或亦可以備殘缺焉

一 梁蕭氏方等 三十國春秋魏崔氏鴻 十六國春秋

宋劉氏恕 十國紀年等書皆分紀列傳體擬正史

西夏事散見諸史者不過朝貢攻伐數大端卽歷朝一統志陝甘新舊通志綏靈寧夏各州衛志自拓跋啟疆職方失考終夏之世絕少人文蒐羅不易紀傳爲難惟于立國之始終傳祚之世數以及夫朝政之理亂主德之昏明皆約而可稽爰爲件繫條分綱舉目附名之曰書事

一繼遷立國元昊稱尊開國承家幾與有宋相終始而西夏之稱亦始于宋則書西夏當以宋爲斷然溯契丹者大基習宇志女真者盛始胡來夏自思

恭秉節夏綏綿延五代爵晉西平擬之當時荆南吳越諸國無多讓也首卷追述中和蓋亦討本尋源之意

一朱子作綱目凡正統未一天下概不大書年號明

屠氏喬孫項氏琳所訂十六國春秋悉將晉宋正

統繫年蓋尊中國大一統理固然也李氏系出羌戎稱臣唐宋故自始迄終悉以中國冠元至元昊僭號始書改元某年備列年數于後

一綱目正統繫年之下分注僭國某年所以別正僞

紀興亡也西夏自繼遷請婚遼國乾順受地金源
玉帛干戈紛紜錯襍若不節注二國紀年事難稽
考然俟互有關涉方行附入既便查核亦免支離
一元托克托纂修三史惟金史列傳年月稍詳餘則
叙事混濛詮次頗難是編分年析月悉遵三史帝
紀夏國附傳或遵王氏傳東都事畧李氏燾通鑑
長編及薛氏應旂宋元通鑑商氏輅宋元續綱目
王氏宗沐徐氏乾學畢氏沅通鑑後編續通鑑諸
書其餘稗官紀載時日不同亦必前後不相矛盾

方始甄錄

一以宋遼金書借叙夏事最易喧客奪主篇中綱主
西夏日則參引諸史間有刪節乃以嚴主客之辨
非敢蹈割裂之愆

一古史體例一代之主必著論贊西夏統系絕續者
三自思恭至彝昌而一絕自仁福至繼捧而再絕
因其尙未成君僅附總論若繼遷建都西平傳德
明而封夏王至元昊而稱國主自可卽其行事述
其生平偶附小論餘皆仿此

西夏書事 八
一史以傳信亦以傳疑是編于宋遼金事稍涉西夏
靡不收羅然有時地不詳及原委莫竟者則于分
條之後或按時或因事另立附例概不混書以示
疑也

一史各有志如天文地理職官選舉禮樂兵刑別類
分門務取該備而霸史則襍見紀傳中以彰一朝
治亂西夏典策云亡其文志不少概見因就管窺
所及畧志數條姑存梗概簡漏之譏知所不免

一王氏

傳

西夏事畧劉氏

溫潤

西夏須知孫氏

吳宋史藝

文志作蘇氏

夏國樞要及夏臺事迹諸書言人人殊較
之正史不無舛錯至于前賢章奏郡國圖經以及
家乘誌銘叢談野說見有不同詞多相戾竊附已
意訂正之然必詳溯根原藉徵確據非敢憑空臆
斷焉

一史文浩博鑑體謹嚴編輯諸家無不去復刪繁期
于簡核夏事如爭城爭地文畧相同賀節賀正辭
多不載然亦正書附列採綴靡遺非故貪多務得
漫失剪裁良因補罅訂亡無敢疏畧

西夏書事 戶例 四
一古來撰述班固衍司馬氏之文延壽節南北史之
要已足自名一家其有專事網羅不資藍本則亦
文獻具在任吾取攜西夏去今歲餘五百舊籍流
傳率皆零繭焚絲不入機杼焉成經緯書中所錄
根尋散佚參合異同雖然管蒯並收竊幸條流粗
貫後有作者請以爲盤盂之助

一宋元諸儒喜于論史雖不能于聖賢作述深心臆
合無間然其講明切究亦能抉奧探微是編文冗
事襍未免顯晦相參竊于是非邪正之致興亡得
失之由間綴數言以免牴牾倘博雅糾其繆而

賜正之則幸甚

一龍門作史記班氏謂一人之精文重思煩其書多

不齊一矧

廣成

拘墟譎陋愧乏三長賴諸同志參

考互訂數載于茲今幸觀厥成謹登諸君姓氏以
見他山之助裨益良多

長城山之北轉益夏多

漢且信樓下遂令幸勝湖如龍登高保拔刃以

木食一飲

一龍門於其時海女馬一人之辭文重忠其書多

西夏書事

宋之西夏書事

西夏書事卷一

青浦 吳廣成 西齋纂

唐僖宗中和元年春三月宥州刺史拓跋思恭起兵

討賊

拓跋思恭

金史夏國傳夏臣羅世昌譜敘夏國世次稱元魏衰微其居松州者復姓為拓

跋本党項羌

隋書党項傳西羌別種其國在禹貢析支之地東至松州西接葉護南界

春桑北鄰吐渾地方三千餘里新唐書党項有八部以姓別為部落而拓跋氏最強始祖赤

辭初臣吐谷渾可汗慕容伏允待之厚與結婚姻

太宗時諸羌歸順拓跋氏不至貞觀八年行軍大

西夏書事 卷一 一
總管李靖奉詔擊吐谷渾赤辭屯狼道峽抗王師
廓州刺史久且洛生遣使諭以禍福辭曰渾主以
腹心待我不知其他若速去無污吾刀洛生怒引
輕騎破之肅遠山斬首數百級擄雜畜六千太宗
因其敗令岷州都督李道彥招之赤辭從子思頭
潛納欵其下拓跋細豆亦以所部請降赤辭知宗
族攜沮稍欲自歸岷州大都督劉師立復誘之乃
與思頭俱內屬分其地爲懿嗟麟可三十二州以
松州爲都督府擢赤辭西戎州都督賜姓李遂職

貢不絕開元中吐蕃寢盛拓跋畏逼請內徙元宗
詔慶州置靜邊等州處之以赤辭孫守寂爲右監
門都督封西平公天寶之亂守寂有戰功擢容州
刺史領天柱軍使廣德二年河北副元帥僕固懷
恩叛誘党項渾奴刺入寇朔方節度郭子儀以党
項吐谷渾部落散處鹽慶諸州恐其滋亂表徙靜
邊州及夏州樂容等六府党項于銀州之北夏州

之東

明一統志謂夏州卽今寧夏衛諸書俱沿其
舊考杜氏通典及李氏元和郡國志夏州東

至銀州一百八十里東南至延州四百里又續通
典綏州東北至夏州二百六十里以地界按之當

在今榆林 復徙寧朔州吐谷渾駐夏西以離沮之

府界內 于是召大首領左羽林大將軍拓跋朝光拓跋乞

梅等五刺史入朝代宗厚賚之使還綏其部自後

乞梅居慶州號東山部朝光居銀夏號平夏部

宋 奏疏党項是前漢呼韓邪所處河南地幅頓千里 從銀夏泊青白兩池地惟沙磧俗謂平夏是也

貞元中有夏州刺史拓跋乾暉銀州刺史拓跋乾

曜拓跋澄等俱官其地思恭乾暉裔孫也

司馬氏 通鑑考 異曰歐陽氏新五代史作拓跋思敬意謂薛氏舊

五代史避國諱耳後唐書實錄皆作思恭又實錄 天復二年九月武定軍節度使李思敬以城降王

建思敬本姓拓跋鄜延節度思恭保大節度思孝 弟也思孝致仕以思敬為保大留後升節度又徙

武定軍新唐書党項傳思恭為定難節度卒弟思 諫代之思孝為保大節度以老荐弟思敬為留後

俄為節度思恭思敬乃是兩人歐史合為一人誤 據有宥州 太平寰宇記開元二十六年以六胡州

之寶應後廢元和九年于經畧軍復置宥州屬 夏綏銀節度以護党項距故州北三百五十里 稱

刺史 歐陽新史作夏州偏將 時寃句盜黃巢由潼 冉府元龜作夏州將

關陷長安僖宗幸蜀關中大亂思恭糾合夷夏兵

數萬約渭北鄜延節度李孝昌會于鄜州誓牲討

賊剋日入援

按 禮莫重于君臣事莫大于征討有唐中葉太

阿廢銳藩鎮連兵龐勛裴甫之徒乘機肆亂殫財動衆禍難始平迨乾符以後賊陷兩京宰衡稱疾乘輿播遷一時行間將帥非畏賊托風濤之阻卽縱寇畱富貴之資雖有義成入援鳳翔傳檄而有倡寡和寇患益深思恭党項小羌位卑力弱獨能會合鄰道舉義勤王較之代北朱耶雲州赫連奉詔興師者不加一等乎書起兵著其能爲西州之倡書討賊嘉其克盡人臣之誼也

夏四月權知夏綏銀節度事

長安陷夏綏銀節度諸葛爽屯軍櫟陽巢將朱溫誘之爽降賊僖宗遂以思恭爲左武衛將軍權知夏綏銀畱後胡三省曰此拓跋氏強盛遂爲跨據西夏張本

進兵武功

思恭兵進武功與鳳翔鄭畋義存王處存涇原程宗楚河中王重榮四節度盟圖復長安戰于王橋不利

西夏書事 卷一 四
諸軍進薄長安黃巢東走市民爭出迎程宗楚恐
諸將分功獨夜入城肆掠賊訶知官軍不整且諸
鎮不相繼引兵還襲之宗楚死巢復入長安詰旦
思恭與李孝昌來援與賊遇于王橋戰不利死傷
甚衆

秋七月進軍東渭橋

思恭聞忠武節度周岌昭義節度高潯連復鄧華
諸州復與李孝昌引軍進屯東渭橋守水北壘以
逼長安賊遣僞中書令尙讓東面行營都虞候朱

溫帥二萬騎拒之

按上書不利茲書進軍嘉思恭志在滅賊不因
敗而稍挫也

八月授夏綏銀節度使九月與賊將尙讓朱溫戰弟
思忠死之

朱溫尙讓率衆涉渭思恭遣弟思忠迎擊戰于東
渭橋橋表有鐵鶴思忠射之没羽賊駭走思忠逐
北深入歿于陣僖宗贈宥州刺史立祠渭陽

按書死之子節也思忠爲繼遷遠祖史不具官

西夏書事 卷一
諒非顯秩然當賊勢鴟張千里勤王一死報國
非忠勇性成者不能宜其廟食一方祚傳二百
餘年之久也

冬十一月戰于富平不勝奔夏州

諸鎮勤王皆以師老遷延勿進賊將知右軍事孟
楷襲思恭軍于富平思恭力不支領殘衆奔歸本
道

按春秋私逃書奔奔者匹夫之行思恭兵敗不
奉王命擅回本道書以貶之

十二月夏州賜號定難軍

思恭既回夏州繕甲訓兵表請討賊僖宗嘉之賜
其軍號定難促兵入衛

中和二年春正月定難軍節度使拓跋思恭授京城
南面都統夏四月進軍屯渭橋

宰相王鐸見諸道無心討賊發憤請行僖宗命鐸
兼中書令充諸道行營都都統令夏綏鄜延諸軍
會之授思恭京城南面收復都統檢校司空同中
書門下平章事思恭復出兵屯渭橋受鐸節制

按上書不名此復名重歲首也後仿此

秋八月授京城四面都統

思恭以銳士八千頻與賊戰僖宗進為京城四面

收復都統權知京兆尹事

中和三年夏四月定難軍節度使拓跋思恭從雁門

節度使李克用復長安

思恭奉詔從克用討賊連敗賊將尚讓黃揆兵進

軍渭南與克用將楊守宗河中將白志遷等擊賊

一日三捷賊眾奔潰諸軍自光泰門入京城黃巢

焚宮闕遁

秋七月晉爵夏國公

僖宗以思恭討賊功

歐陽新史云朱玫之亂思恭與鄜州李思孝以兵屯渭橋

其後黃巢陷京師與王重榮李克用等同破賊有大功考新唐書

五年鄜夏兵加太子太傅爵夏國公

不至新史誤按此夏國得號之始

復賜李姓

自後歷世仍之

按賜姓始于漢婁敬至唐而盛綱目書之不勝

西夏書事 卷一
書必甚美甚惡乃書思恭之功雖不及克用然較全忠茂貞輩不啻天淵矣書以美之

光啟元年秋九月定難軍節度使李思恭合邠寧軍討河中

河中節度王重榮據鹽鐵之利中尉田令孜惡之建請領屬以佐軍食重榮不可據河中叛令孜使邠寧節度朱玫與思恭合鄜夏軍三萬討之

十二月戰于沙苑敗績

諸軍分壁沙苑王重榮計誘河東李克用合兵拒戰玫不勝鄜夏兵俱敗

光啟二年冬十一月定難軍節度使李思恭奉詔討襄王煝次于綏州

朱玫恥爲中人用與重榮克用連和上表請誅令孜大掠而西僖宗幸鳳翔避之玫與同平章事蕭遘等奉嗣襄王煝權監軍國事據長安旋立爲帝改元建真僖宗詔山南諸鎮及夏州兵討之思恭發兵次綏州觀望不出境已聞煝敗遂還

按春秋伐而書次其次爲善救而書次其次爲

西夏書事 卷一
既時李煜據長安田令孜劫帝如寶雞諸道
貢賦不至從官衛士皆乏食勢不已孔迫乎思
恭顧觀望不前無復以國事爲急書奉詔以嚴
其赴救之責書所次以著其怠緩之罪

文德元年李思恭取鄜延以弟思孝知留後

中和中改鄜延節度爲保大軍以東方達領節度
使達病去思恭遣弟行軍司馬思孝襲取之自稱
留後思恭爲請于朝授鄜坊丹瞿等州觀察使並
檢校司徒同中書門下平章事

按有唐末造藩鎮兼吞始于韓簡之攻河陽繼
于秦宗權之陷鄭州極于朱全忠之并臨淄徐
鄆禍結兵連至唐亡不解思恭之取鄜延所謂
鄭伯效尤也宜後日克用表中以爲口實乎去
官貶之也

唐昭宗大順元年夏六月定難軍節度使李思恭偕
保大軍節度使李思孝出兵會都招討使張濬于晉
州

河東李克用攻防禦使赫連鐸于雲州宣武節度

西夏書事 卷一 九
朱全忠盧龍節度李匡威奏討之宰相張濬請任其事昭宗令將京軍數萬及邠寧雜虜三萬人抵晉州思恭與思孝率鄜夏兵會之

冬十月棄張濬軍先歸

官軍出陰地關李克用遣養子李存孝營于趙城擊敗鎮國節度韓建兵乘勝抵晉州西門張濬出戰又敗入城拒守思恭與保大靜難鳳翔諸軍先渡河歸

按晉州之役議者咸咎張濬小人淺謀誤國然將帥與其事者不當以是非論也思恭既奉命與師則敵王之愾惟力是視乃見敗不救棄帥先歸直書之其罪自見

乾寧二年定難軍節度使李思恭卒弟思諫嗣

思恭子仁祐早卒孫彝昌幼軍中立其弟思諫嗣爲節度使

按此李氏世襲節度之始

秋七月保大節度使李思孝擒邠寧將王令陶于黎園寨

邠寧節度王行瑜求尙書令不得與鳳翔節度李
茂貞舉兵犯闕遣將王令陶據黎園寨思孝與河
東將李存信攻揜之獻于行在舊唐書八月己丑
李克用自至渭橋
若癸巳于黎園殺邠寧軍數千獲大將王令陶以
獻又詔鄜州節度李思孝以本軍進討似屬兩事
而薛氏舊史存信傳則合
爲一司馬氏通鑑從之

八月思諫思孝充邠寧東北二面招討使

李茂貞聞河東兵至斬假子李繼鵬上表請罪王
行瑜拒守如故昭宗命思諫等爲招討使從邠寧
四面行營都招討李克用討之

乾寧三年春三月保大節度使李思孝致仕表弟思
敬自代

昭宗詔思孝以太師致仕思敬爲保大軍兵馬留
後旋授節度使後徙武定軍附李茂貞天復二年
西川王建攻之思敬舉洋州降

乾寧四年春正月定難軍節度使李思諫兼寧塞軍
節度使

中和二年以延州置保塞軍

司馬氏通鑑作三年
此從唐書方鎮表

已更號寧塞

此據司馬氏通鑑考新唐書方鎮表
光化元年更延州保塞軍節度爲寧

塞軍節度是乾寧四年鎮是時李茂貞據延洋秦名未改也不知通鑑何據隴諸州朝廷命思諫兼寧塞節度以分其勢茂貞不奉詔

附

司馬氏通鑑乾寧四年夏四月加定難軍節度使李承慶同平章事而新舊唐書党項傳思諫一生未嘗離定難何以節度忽易承慶此或坊本有誤故從附書

秋九月奉詔討李茂貞授鳳翔行營四面副都統

當時興元邠寧鄜坊河中同華諸鎮之兵並起交爭惟夏州不爲唐患朝廷寵錫優異時鳳翔李茂貞復以兵逼京畿神策諸軍不能禦昭宗奔華州詔加思諫副都統命帥師與鳳翔四面行營都統孫偓會諸道軍討之茂貞尋上表請罪願得自新師不出

唐昭宣帝天祐三年秋九月邠州李繼徽將六鎮兵攻夏州冬十月李思諫告急于梁梁遣劉知俊等擊走之

先是朱全忠攻邠州降靜難節度李繼徽繼徽茂

貞假子也全忠令鎮邠州質其妻子于河中已而私其妻繼徽怒遣使與茂貞連兵茂貞令率鳳翔靜難彰義秦隴等六鎮兵圍夏州思諫告急于全忠全忠使匡國節度劉知俊出兵援之繼徽以五萬衆陣于美原知俊擊破之乘勝取鄜州等地自是夏州服于梁

按此李氏變節之始去官貶之也自是終梁之世皆不具官

梁太祖開平元年夏五月李思諫加檢校太尉兼侍

中

梁受唐禪遣使宣諭州鎮封兩浙錢鏐爲吳越國王如思諫等皆進秩

開平二年冬十一月李思諫卒思恭孫彝昌嗣

軍中遵思諫遺命共立思恭孫彝昌爲畱後

薛氏舊史

及王氏東都事畧以彝昌爲思諫子而尋起復正宋史夏國傳云思諫卒思恭孫彝昌嗣

授旄鉞

開平三年春二月夏州將高宗益弒其節度使李彝

昌

昌宗益官夏州都指揮與其黨謀據夏州遂作亂執
彝昌殺之

按前書李氏不具官茲書節度使何正高宗益

之罪也夫彝昌為思恭孫不能繩其祖武屈首

朱梁固不為無罪然以宗益戕之則下犯上矣

續綱目書殺此書弑揆之尊卑上下之義或倍

下謹嚴云

後 三月夏州人誅高宗益迎蕃部指揮使李仁福為留

夏州將吏誅高宗益并其黨相率迎仁福于戍所

立為留後仁福以聞梁祖授檢校司空定難軍節

度仁福彝昌族父也

歐陽新史及王氏東都事畧皆云仁福不知于思諫為親

疎也宋史夏國傳彝昌遇害將士立其族子蕃部

指揮使仁福司馬氏通鑑考異云仁福諸子皆連

行也當以通鑑為正 按當時朝廷衰亂方鎮專恣非以部民逐主帥

即以偏裨領軍務上下恬然毫不知怪夏州將

吏獨能誅討逆賊迎立故宗其忠義之氣有非

他州可及者書以嘉之

論曰思恭際拓跋中衰平夏勢弱而以區區一
州之衆事十八葉天子于危亡之際振數十世
遺緒于頽廢之頃蓋不特著忠于國抑且垂裕
于家也雖其取鄜延棄張濬事多可議顧當邠
寧犯順岐汴刦遷方鎮爭衡中原板蕩獨不聞
夏州一騎渡河其保境息民循分效順爲何如
耶思諫嗣職庸庸自保視椒蘭之弑而不知援
見汴梁之篡而不之討畧公義重私恩以視思
恭殆有愧焉然當授受之際承兄繼姪爲宋太
宗元仁宗所不能爲亦可謂善全同氣者矣彝
昌立甫逾年身無失德禍及閤門以思恭亮節
再傳而嫡嗣云亡殊可慨已

開平四年秋七月晉師岐師圍夏州李仁福城守不

下

梁忠武節度劉知俊功名寖盛見梁祖性日猜忍
內不自安潛以同州附于岐王李茂貞後兵敗奔
岐茂貞無地處之使將兵取靈夏知俊攻靈州兩
月不克于是茂貞與邠寧節度李繼徽涇原節度

李繼鸞遣使太原請會兵攻夏州晉王李存勗令

振武節度周德威于是月

劉邠五代春秋八月晉人秦人侵夏州與五代

史通

合五萬衆自麟府渡河初梁祖遣供奉官張

漢玫國禮使杜廷隱諭賜夏州抵石堡寨聞晉岐

軍至廷隱以防卒三百人星馳入城既而圍合仁

福兵力俱乏偕廷隱漢玫與指揮使張和李君用

率州民及防卒分陴拒晝夜不少懈

按拓跋與朱耶滅黃巢賜國姓同功一體人也

晉王志在滅梁仁福若舉四州之衆與之共扶

王室則揚劉夾寨諸戰仁福身在行間存勗何

敢專爲己功從此共求李氏立之何後唐之有

哉乃授甲登陴誓爲賊守其有愧于沙陀之賜

姓多矣

冬十一月鄜延援師至圍解

仁福固守逾月遣使告急于梁梁祖遣夾馬指揮

使李遇劉綰率鄜延師直趨銀夏邀其歸路大破

之

薛氏舊史後唐紀是役也劉知俊爲岐人所搆乃自退與梁紀異且梁紀在十一月唐紀在九

月茲從

梁紀 晉岐軍皆解去

西夏書事 卷一
十二月加檢校太保同平章事

梁祖嘉其却晉岐師也

附薛氏舊史梁紀乾化元年夏四月己卯詔曰
邠岐未滅關隴多虞宜擇親賢總統戎任應關
西同雍鄜延華夏等六道兵馬並委冀王收掌
指揮是時夏州奉詔出兵與否攷新舊兩史並
不載

乾化二年春正月李仁福加檢校太尉
並益食戶實封

梁末帝乾化三年春三月李仁福加檢校太師兼中
書令封隴西郡王

按此李氏封王之始新舊五代史乾化二年封
高季昌渤海郡王是荆南受封先夏州一載耳
後世史家顧以高氏備十國置李氏不與何也
龍德二年春二月李仁福入獻

晉兵圍德勝末帝徵諸道軍赴援仁福聞之貢馬
五百匹助戰

正百四十四

唐文宗皇帝未嘗為清微軍討契丹而國之責歸
於唐文宗皇帝未嘗為清微軍討契丹而國之責歸

唐文宗皇帝未嘗為清微軍討契丹而國之責歸

唐文宗皇帝未嘗為清微軍討契丹而國之責歸

唐文宗皇帝未嘗為清微軍討契丹而國之責歸

唐文宗皇帝未嘗為清微軍討契丹而國之責歸

西夏書事卷一終

西夏書事卷二

青浦 吳廣成西齋集纂

後唐莊宗同光二年夏四月定難軍節度使李仁福

晉朔方王

仁福聞莊宗滅梁自以向拒晉師中懷恐懼首遣

宥州刺史李仁裕奉表入賀莊宗詔晉仁福爵仁

裕仁福從兄也

按前書仁福不具官茲特具官者殆以後唐繼

統嘉其反正乎非也蓋朱梁為唐室賊臣從之

者皆賊爾書法自不容稍假若後唐與晉漢周
史臣稱爲亂世例可從寬昔朱子作綱目于周
室未亡天子在上則以王法正諸侯之稱迨周
室既亡上無天子則諸侯悉任其所稱劉氏謂
此綱目隨時變通不得已之意也故自同光訖
顯德李氏非大悖逆不去官

後唐明宗天成元年綏銀軍亂剽州城

夏俗喜復仇然有凶喪者不伐已負甲葉爲記仇
解用雞猪犬血和酒貯罇體中飲之祝曰若復報

仇穀麥不收男女禿癩六畜死蛇入帳其力微不
能復者則集鄰族婦女烹牛羊具酒食介而趨仇

家縱火焚其廬舍俗謂敵女兵不祥

其俗稱婦
人爲麻魁輒

避去訴于官故事州刺史之下有和斷官擇氣直
舌辨者爲之以理其曲直殺人者納命價錢百二
十千綏銀爲夏州巡屬兩州兵以細故相仇殺主
者究詰之遂鬩而起縱掠二州城市銀州防禦使
李仁顏與綏州刺史李彝敏討定之仁顏仁福族
弟彝敏仁福族子也

天成二年秋九月定難軍節度使李仁福賜功臣號
與鳳翔節度李從曠朔方節度韓洙並加食邑

附薛氏舊史唐紀天成三年秋七月貶刑部侍

郎馬縞為綏州司馬曹州刺史成景宏為綏州

司戶參軍續流宥州攷河西自李氏世襲綏宥

諸州不歸十道故終五代諸姓不復銓除明宗

此舉或欲示其威權而李氏從違新舊兩史並

不載

天成四年冬十月夏州進白鷹

樞密使安重誨拒不受明宗密遣人諭使者納之

宮中

長興四年春二月定難軍節度使李仁福卒子彝超

嗣

仁福追號號王

胡氏通鑑註云李仁福子孫強盛遂為宋朝西邊之禍所謂西夏也

攷宋史夏國傳仁福傳至繼捧而絕繼遷乃銀州防禦使仁顏後胡氏不明西夏世系後并以繼捧

繼遷為彝
殷子謬

三月徙為延州留後彝超不受代

先是夏州党項寇延州守臣擊敗之追至賀蘭山

而還於是邊將多言仁福潛通契丹

薛氏舊史言河西諸鎮皆

言李仁福潛通契丹司馬光曰是時河西止有涼州沙州二鎮然使命不常通也竊意河西當作關西歐陽新史只作邊吏多言仁福通於契丹

朝廷恐其併吞河朔南侵

關中會仁福卒三軍立左都押牙四州防遏使彛超爲留後矯爲仁福奏云臣疾日甚已委子彛超權知軍事乞降真命明宗怒命彛超移鎮延州以延州節度安重進爲夏州留後又命邠州節度藥彥稠宮苑使安從益帥師送重進赴鎮仍降詔諭之云近據西北藩鎮奏定難軍節度使李仁福薨

朕以仁福自分戎闔遠鎮塞垣威惠俱行忠孝兼著當本朝播遷之後及先皇興復之初爰及渺躬益全大節統領有術遠邇咸安委仗方深凋殞何速突觀所奏深愴予懷不朽之功旣存於社稷有後之慶宜及於子孫但以彼藩地處窮邊每資經畧厥子年纔弱冠未歷艱難或虧駕馭之方定啟奸邪之便其李彛超已除延州節度觀察留後使勒赴任但銀夏綏宥等州曷居邊遠多染夷狄之風少識朝廷之命旣乍當於移易宜普示以渥恩

其夏銀綏宥等州管內罪無輕重常赦所不原者并公私債負殘欠稅物一切並赦自刺史指揮使押牙以下皆勒依舊各與改轉官資朕自總萬幾惟宏一德內安華夏外撫戎夷先旣懷之以恩後必示之以信且如李從暉之守岐隴疆土極寬高允韜之鎮鄜延甲兵亦衆咸能識時知變舉族歸朝從暉則見鎮大梁允韜則尋除鉅鹿次及昆仲並建節旄下至將僚悉分符竹又若王都之貪上谷李賓之恡朔方或則結搆契丹偷延旦夕或則依憑党項竊據山河不稟除移惟謀旅拒纔興討伐已見覆亡何必廣引古今方明利害祇陳近事聊諭將來彼或要覆族之殃則王都李賓足爲鑒戒彼或要全身之福則允韜從暉可作規繩朕設兩途爾宜自擇或慮將校之內親要之間幸彼幼冲恣其熒惑遂成騷動致累生靈今特差邠州節度藥彥稠部領馬步兵士五萬人送安重進赴任從命者秋毫無犯違命者全族必誅先令後行有犯無赦云已彝超上言臣奉詔授延州留後已迎

西夏書事 卷二 三
受恩命緣三軍百姓擁隔未遂赴鎮明宗復遣閣
門使蘇繼顏賚詔促之彝超不納

按李氏自知留後三世矣茲軍中已立彝超不
書官未王命也特書徒何李氏世居夏州明宗
特詔移之於此可以覘乾綱於此可以觀臣節

夏四月發兵守青嶺門五月襲蘆關不克

彝超聞重進軍至遣兄阿囉王守青嶺門集境內

党項諸胡以自救藥彥稠等進屯蘆關

曾布日錄云羌中人

馬入漢界至蘆關百三十里四無水泉彝超遣党項抄掠糧運及攻

具官軍自蘆關分兵退保金明一夕夏州城上舉

火比明雜虜數千騎突至重進遣先鋒使宋溫擊

之虜騎敗走

秋七月官軍攻夏州拒却之

重進乘勝進攻夏州州城爲赫連勃勃所築

宋白曰夏

州城赫連勃勃蒸土所築在朔方之北黑水之西其城土白而堅南有亢敵峻險非人力所能攻

堅如鐵石官軍穴地道至城下剗鑿不能入彝超

兄弟登城謂重進曰夏州貧瘠非有珍寶蓄積可

充朝廷貢賦但以祖父世守此土不欲失之葺爾

孤城勝之不武何足煩國家勞費如此幸爲表聞
若許其自新或使之征伐願爲衆先時四面党項
萬餘騎抄掠糧運官軍無所芻牧山路險狹關中
民輸斗粟束藁費錢數緡困敝不能供明宗遂命
班師重進等還軍伍不整彝超令部下逐之官軍
遺戈棄甲死亡甚夥其後有知夏州陰事者云仁
福畏朝廷除移揚言結契丹爲援契丹實不與之
通也致朝廷誤興是役無功而還自是李氏益輕
朝廷

按此李氏顯據夏州之始

冬十月遣使請罪仍授定難軍節度使

彝超上表請罪求昭雪明宗授定難軍節度檢校
司空加檢校司徒彝超修貢如初

後唐廢帝清泰二年春二月定難軍節度使李彝超
卒弟彝殷代

彝超奏已疾病以弟行軍司馬彝殷權知留後彝

殷遂代爲節度

薛氏舊史以彝殷爲彝超兄司馬
氏通鑑仍其舊文宋史夏國傳及

王氏東都事畧
俱作彝超弟

西夏書事 卷二
晉高祖天福元年春正月定難軍節度使李彝殷加
檢校太尉同平章事

晉祖以皇基初造詔彝殷與湖南節度楚王馬希
範鳳翔節度西平王李從暉並加官及封邑示普
恩也

晉出帝天福八年春三月定難軍節度使李彝殷加
檢校太師

時以楚王馬希範守尙書令兼中書令彝殷亦加
官

按李氏自後唐入晉非有大功可紀而晉爵拜
官書不勝書前賢謂亂世之爵賞不足以服人
適足以驕人其以此夫

秋七月綏州刺史李彝敏作亂奔延州

彝敏結夏州衙內指揮拓跋崇斌襲州城事泄彝
殷擒斬崇斌出兵襲擊彝敏敗與弟彝俊等五人
棄州挈骨肉二百七十口奔延州當州押送赴闕
稱與兄彝殷偶起猜嫌互相攻擊故也

八月彝殷表李仁裕知綏州

西夏書事 卷二
仁裕在宥州多戰功西羌服其威猛彝殷以綏州
新亂奏使權知州事出帝從之

九月李彝敏伏誅

彝殷表奏彝敏作亂狀出帝諭彝敏潛結克黨顯
恣逆謀骨肉之間尙與屠害照臨之內難以舍容
命執送夏州令彝殷斬之

按彝敏執送夏州彝殷奉王命斬之用以警蕃
部之不靖者揭書伏誅則賊臣之罪正而天討
之嚴著矣

開運元年春正月定難軍節度使李彝殷起兵助攻
契丹

契丹自後魏始見中國至唐而盛其地北接室韋
東隣高麗西界夷國南至營州種分八部部有大
人常推一大人爲王建旗鼓統之三年則以次相
代唐末有阿保機者滅七部一之僭稱帝號阿保
機死子德光嗣後唐清泰二年晉高祖起兵河東
遣使求助約事捷之日割盧龍一道及雁門關以
北諸州爲謝德光親將兵五萬會之遂滅唐社終

高祖世奉事不衰出帝立從天平節度景延廣議稱孫不稱臣契丹遣使責讓延廣以言觸之契丹主怒會平盧節度楊光遠叛引契丹兵由馬家口入寇彞殷合蕃漢兵四萬自麟州渡河侵契丹西境以牽制之

按

綱目書定難軍節度使李彞殷侵契丹以救

晉夫救善詞亦急詞也當契丹入寇大河以南諸鎮袖手獨彞殷侵入其境以撓兵勢故書以善之乎然考晉自延廣挑釁北虜南牧一敗於鴉鳴谷再敗於戚城三敗於馬家口卽無彞殷之衆晉力尙足相當迨開運二年滹沱師潰將帥北降此時望救孔殷不聞夏州一卒渡河何耶茲不書救而書助以見彞殷此舉無關於晉之緩急然仍不沒其善也

西羌啖母族亂綏州刺史李仁裕擊之敗死

羌性強悍帳族有生熟戶接連漢界入州城者謂之熟戶居深山僻遠橫過寇掠者謂之生戶其人多有世仇不相往來遇戰鬪則傳箭相率其從如

流俗尚然也唃母乃西羌熟戶仁裕在州頗事威福蕃性不便唃母舉族謀亂走南山仁裕率所部追擊戰敗為所殺

夏四月授彝殷契丹西南面招討使
出帝以彝殷協助有功故有是命

漢隱帝乾祐元年春二月定難軍節度使李彝殷兼侍中

隱帝以登極恩命彝殷與湖南節度楚王馬希廣並進秩

三月請討西羌

彝殷上表賀請討叛羌唃母族為李仁裕報仇率

眾屯境上慶州請益兵為備謂備羌也隱帝以司天言

今歲不利先舉兵諭止之

夏六月河中李守貞遣使夏州乞援

護國節度李守貞久蓄異謀是時漢室方新嗣君纔立自謂舉無遺策發兵扼潼關稱秦王遣人賫蠟書重幣至夏州求援

秋八月彝殷出兵次延州

彝殷聞鳳翔王景崇永興趙思綰與守貞連衡陝州節度白文珂攻之不克乃亦出兵逼延州爲守貞聲援已隱帝遣樞密使郭威赴河中節制諸軍掘長塹築連城困之彝殷遂抽師回

按綱目書漢護國節度使李守貞反反者逆詞也出師以援逆是亦反而已然書次于延州次者緩詞何氏休曰從義兵緩而後者功薄從不義兵緩而後者惡淺是則彝殷之罪可從末減故不書反而書次以原之

冬十一月上表自陳

延州節度高允權素與彝殷不協夏州兵雖退允權以聞彝殷上章自訴紛然互訐隱帝賜詔和解之

乾祐二年春二月以靜州隸定難軍李彝殷上表謝彝殷見中原多故有輕傲之志藩鎮有叛者輒以兵陰助之邀其重賂朝廷知其事亦以恩澤羈縻之史臣曰拓跋據銀夏是時漸以桀驁遂成宋朝繼遷之亂

按此定難軍屬有五州之始

秋九月賜兼中書令

隱帝因河中平命彝殷與兩浙節度吳越國王錢宏俶湖南節度楚王馬希廣並加官

周太祖廣順元年春正月定難軍節度使李彝殷復封隴西郡王

隴西本仁福舊封是時周祖新立復封荆南節度高保融爲渤海郡王彝殷亦復舊爵然彝殷未嘗表賀也

夏五月遣使附于北漢

周祖殺湘陰公劉贇夷夏胥怨贇父鈞起兵太原稱北漢彝殷遣使奉表附之

按夏州當五代之時自開平訖顯德終始五十二年暮楚朝秦充然無復廉耻然其表附北漢則有可取焉蓋郭威篡奪漢祚弒湘陰公四方藩鎮靡然從之於時北顧太原危如一綫彝殷獨以邊方慕義力扶孱弱是真不以成敗利鈍之見存於中者也

西夏書事 卷二 三
廣順二年冬十二月北漢麟州刺史楊崇訓求援於
夏州不應

初麟州土豪楊信自爲刺史受命於周信卒子崇

訓嗣

司馬氏通鑑考異崇訓或作崇勳世宗實錄作崇訓後避恭帝諱改作重訓

同彝

殷以州降北漢至是爲郡羌所圍乃求救于夏州
彝殷不赴

顯德元年春正月定難軍節度使檢校太尉加太師
侍中兼中書令同平章事李彝殷晉西平王

周祖以疾祀園邱改元大赦內外職官並加恩於
是荆南高保融封南平王彝殷亦封西平王

按五代之際篡亂相仍豪傑蜂起稱帝稱王不

可枚舉後世史臣撫其遺事特於紀傳表志外
立爲世家蓋尊之也李氏坐擁河西自思恭至
彝殷已傳六世使其先妄自稱尊誰得禁之乃

於朱梁始膺王號後唐繼進朔方迨周顯德改
元爵晉西平遂得與吳越荆南並列夫律以春
秋之義李氏固未得爲純臣然與五代諸世家
較不特遙遙華胄足以推重當時卽其服事中

西夏書事 卷二
朝保輯境內歸往之謂王當之庸有愧乎故具
官書封以見有土有爵有世系若列入世家可
謂名稱其實矣

秋七月加守太保

世宗新卽位覃慶諸侯彝殷於是月辛巳與南平
王高保融並進秩

周世宗顯德二年春正月定難軍節度使李彝殷以
兵塞府州路旣而罷之

夏州爲緣邊大鎮李氏世秉節旄素自貴重元年
五月府州防禦使折德辰入朝世宗置永安軍於
府州卽以德辰爲節度折氏晚出彝殷惡其職與
已埒以兵塞路不許通詔使世宗謀於宰相對曰
夏州邊鎮朝廷每加優恤府州褊小得失不繫輕
重且宜撫諭彝殷庶全大體世宗曰德辰數年來
盡力以拒劉氏奈何一旦棄之且夏州惟產羊馬
百貨悉仰中國我若絕之何能爲乃遣供奉官齊
藏珍賚詔責之彝殷惶恐撤兵謝罪

按昔劉平謂五代之末中國多事惟制西戎爲

得之中國未嘗遣一騎一卒遠屯塞上但任土豪爲衆所伏者封以州邑征賦所入足以贍兵養士由是邊鄙安寧表獻不絕今觀彝殷兵塞府州世宗以一詔撤之於茲言益信

顯德四年冬十一月李彝殷叛北漢誘楊崇訓歸周彝殷計誘崇訓歸周與永安節度折德辰上言河東麟州刺史楊崇訓屢被蕃部攻圍乞歸世宗詔曰據夏州節度使李彝殷奏崇訓等拒命吾朝被蕃部侵迫欲歸備覩變通之意特用宏納之仁宜分析名銜申奏加恩酬賞遂授崇訓本州防禦使檢校太傅

按彝殷既事北漢又復臣周已屬守義不固而又計致崇訓乃情之無可原者書叛書誘深罪之也

秋七月加太保

益食邑六百戶實封三百戶

周恭帝顯德六年秋七月定難軍節度使李彝殷加太傅

西夏書事 卷二 三
史臣曰拓跋氏攷諸前史可見也自赤辭納款於
貞觀守寂立功於天寶中和初思恭以宥州舉義
秉節夏綏厥後子孫歷鎮五代地逾千里爵進西
平供賦不入公朝巡屬惟其除授蓋夏雖未稱國
而自王其土久矣

論曰事有必至理有固然自古未有爲國守土
爲民惜命而其後不昌者試觀唐季鷁軍赴難
肇啟後唐負璽從行遂開前蜀射潮保境吳越
歷有百年伏甲誅殘南漢祚傳五主積功食報

自古爲昭拓跋自思恭舉義思諫討李茂貞思
孝破王行瑜有徵必至無役不從當是時中原
鼎沸闡帝圖者八姓十三君郡邑瓜分秉節旄
者九州數十主閭閻多誅求之困行間切鋒刃
之憂獨銀夏綏宥靜五州兵不事戰征民不睹
金革休養生息幾及百年西夏之昌早基於此
而歐陽五代史列南平高氏於世家置西平賜
姓於雜傳例不盡符故余敘西夏事自中和訖
顯德歷書其顛末以補新史之闕云

西夏書事卷二終

西夏書事卷三

青浦 吳廣成西齋 纂

宋太祖建隆元年春正月定難軍節度使西平王李彝興加太尉

彝殷于顯德中雖受恩秩貢奉甚稀聞太祖受禪遣銀州防禦使李光曦奉表入賀避宣祖諱改名興太祖嘉之使守太尉光曦彝興族子也 陳師道曰宋初職備三公者內則趙普外惟彝興彝興以藩鎮領之尤異數也

西夏書事 卷三
三月遣都將李彝玉禦北漢兵于麟州
北漢主劉鈞結代北諸部侵掠河西太祖詔諸鎮
會兵禦之彝興遣彝玉進兵抵麟州北漢引去遣
使告捷彝玉彝興從弟也

按此李氏立功宋室之始

建隆三年夏四月定難軍節度使李彝興貢馬

宋初市馬沿邊陝右諸州最盛河東川峽僅居其
半如麟府豐嵐益文黎雅及唐隆鎮濁輪砦岢嵐
火山永康等軍未入版圖場市甚隘彝興聞北漢
兵常擾麟州知中國需馬遣使以良馬三百匹入
獻

五月賜玉帶

太祖嘉彝興命玉工治帶親臨視之召夏使問曰
汝帥腰圍幾何使言彝興腰腹洪大如合抱之木
太祖嘆曰真福人也帶成遣使賜之彝興感服

按有宋幅幘之廣東南至海西盡巴剌北極三
關疆理幾復漢唐之舊其未入職方者止燕雲
十六州及西夏五州耳然燕雲爲北門鎖鑰石

西夏書事 卷三 二
晉失之遂開契丹入寇之徑若銀夏諸州羌戎瘠壤得其地不可耕撫其衆不可守非若吳越荆南近在肘腋勢所必爭也太祖有見于此因其貢獻厚加賜賚以服其心而羈縻之誠得柔遠之道哉

秋九月夏州蕃尙波于以伏羌縣地入獻

初秦州西北夕陽鎮連接山谷材木所出夏人久擅其利尙書右丞高防知秦州建議置採造務闢地數百里築堡要害募卒三百人爲戍自渭而北

夏人有之自渭而南秦州有之歲獲大木萬章給京師夏屬酋長尙波于率蕃部千餘人涉渭奪木筏殺兵役防與戰敗之俘其屬四十餘人以獻太祖不欲邊境生事遣使至夏州諭彝興約束之悉歸其所俘賜以錦袍銀帶尙波于感恩遂以所居伏羌縣地詣秦州獻

按綱目攻取之際地有關於成敗之大者必特書重之于時尙波于獻伏羌縣地宋與夏未交惡也何以書蓋伏羌據西北險要爲秦渭屏藩

西夏書事 卷三 三
異時繼遷頻犯涇原延慶不入秦州卽元昊再犯渭州亦信宿卽去地勢使然也兼以壤接吐蕃潘羅支唃廝囉之屬全倚秦渭聲援乃敢與夏州抗若伏羌不通二族何恃以建功可不謂重乎況繼遷未生伏羌先入更若有天意存其間焉

乾德元年春二月銀州防禦使李光曦生子繼遷

光曦贈宥州刺史思忠後祖仁顏以長厚稱仕唐爲銀州防禦使父彝景嗣于晉光曦嗣于周宋初

曾奉彝興表入賀循謹有禮太祖賜資甚厚至是與妻罔氏游無定河生繼遷繼遷生卽有齒見者

咸異之

宋史夏國傳建隆四年繼遷生于銀州之無定河太祖紀建隆無四年因是年十一

月改元乾德史臣于帝紀卽以乾德紀年而夏國傳仍其舊也茲正之

按王侯子生無故不悉書繼遷州將子曷以書

爲其厄宋也然繼遷不厄宋則李氏將不存是又西夏之興亾係焉故書

夏四月彝興獻犛牛一

犛牛生西羌似牛而尾甚長毛可爲翽異產也彝

興得之遣使以獻

康譽之昨夢錄西夏有竹牛重數百斤角甚長黃黑相間用以

製弓極佳夏人常襍犀角以市焉吳任臣山海經注謂卽犛牛之類攷物類志犛牛足四節廣志犛牛黑色出西南徼外腹下及肘皆有赤色長尺餘尾大如斗天子左纛以此尾爲之或曰尾長而勁中國以爲纓人若射之則自斷其尾與竹牛異

乾德五年秋九月定難軍節度使太尉兼中書令西

平王李彝興卒子光叡權知州事

彝興嗜貨財識機變五代時雖向背不常然未嘗顯與中國抗入宋後貢奉惟謹徵調時應北漢劉鈞累遣使持幣由間道約以兵助彝興不納太祖

聞厚賚之至是卒太祖廢朝三日贈太師追封夏

王子行軍司馬光叡自權知州事

附宋史劉平傳平獻攻守之策言太祖有天下

懲唐末藩鎮之盛盡削其兵柄收其賦入邊方

世襲宜異于此而誤以朔方李彝興靈武馮繼

業一切亦徙內地自此靈夏仰中國戍守千里

運糧兵民交困張方平傳太祖不勤遠畧如靈

夏河西皆因其酋豪許之世襲及太宗謀取燕

薊內徙李彝興馮暉于是朝廷始旰食矣攷夏

國傳及李氏長編彝興歸宋無內徙事
冬十月光獻授定難軍節度使

加檢校太保

開寶元年冬十月夏州屬蕃擾邊

太祖以夏州近邊授董遵誨爲通遠軍使遵誨至
鎮名綏夏夷落諭以朝廷威福衆皆感悅至是未
數月夏州蕃族擾邊遵誨率兵討定之光獻遣使
謝

開寶三年秋九月綏州亂故刺史李光琇子丕祿討
平之

綏州羌族强悍易于騷動刺史李光琇在州繕完
城堡訓約戎夷一方安之及卒羌人乘隙爲亂丕
祿捕首事者誅之餘黨遂散

開寶四年春正月李丕祿授綏州刺史

綏州定光獻令丕祿權知州事表聞于朝太祖詔
授本州刺史

開寶五年春三月定難軍節度使李光獻請入朝
光獻聞太祖解諸將兵權罷藩鎮節度內不自安

西夏書事 卷三
遣使貢獻表請入朝詔不許

開寶七年定難軍節度使李光叡以李繼遷爲管内都知蕃落使

繼遷善騎射饒智數嘗從十餘騎出獵有虎突從山坂下繼遷令從騎悉入柏林中自引弓踞樹巔一發中虎眼斃之蕃部由是知名光叡愛其勇遂授以官

開寶八年夏五月北漢兵侵銀州

北漢劉繼元數出兵寇宋不克遣使招誘夏州光叡不從繼元怒遣兵萬餘渡河掠銀州光叡禦却之

開寶九年秋九月定難軍節度使李光叡率兵伐北漢

北漢兵旣却後復數使招諭光叡並以聞太祖以江南旣平命侍衛都指揮使党進宣徽北院使潘美率兵伐漢分五道入太原又命兵馬監押馬繼恩進河東界焚蕩堡砦光叡亦率所部次天朝定朝兩關遣使表言伺黃河凍合進兵

冬十月攻吳堡寨破之

斬首七百級獲牛羊鎧甲數千俘寨主侯遇以獻改名克敵

時太祖崩太宗卽位光字避帝諱也

宋太宗太平興國元年十二月

卽太祖開寶九年定太宗于是月改元

難軍節度使李克敵加檢校太尉

太宗卽位嘉克敵擊北漢功晉秩褒之

太平興國二年冬十一月夏人掠靈州進奉使

羌人素不知教養自彝興歸宋後蕃部數犯西鄙慶州刺史姚內斌號武猛在鎮十餘年西夏畏伏不敢犯塞及內斌卒羌族復肆時靈州貢使回夏人游牧過境猝遇之悉奪其鞍馬器甲去知通遠軍兼靈州巡檢董遵誨移檄夏州欲討之克敵懼執送作過蕃酋盡歸所掠請罪

按

前書夏州屬蕃擾邊茲書夏人掠靈州進奉使西羌驚悍易肆難馴異日繼遷之亂其端已

見

太平興國三年夏五月定難軍節度使李克敵卒子

西夏書事 卷三
繼筠嗣

克獻馭下寬和屬下有小過輒不較故終其世羌人感悅無攜貳者太宗聞其卒廢朝二日贈侍中子衙內都指揮使檢校工部尚書繼筠自權知州事旋授檢校司徒定難軍節度觀察畱後

太平興國四年春三月定難軍畱後李繼筠出兵討北漢

太宗親征北漢繼筠表率所部進討因遣銀州刺史李克遠綏州刺史李克憲率蕃漢兵卒緣黃河列塞渡河畧太原境以張軍勢

按漢周世爲仇讐廣順顯德中無歲不擾宋有天下餘忿未消猶以兵寇麟府諸州李氏自歸宋以來頻與漢戰累立大功其効順之心可謂誠矣

太平興國五年冬十月定難軍畱後李繼筠卒弟繼捧嗣

繼捧本衙內都指揮嗣爲畱後

太平興國六年秋八月銀州刺史李克遠襲夏州不

克

初繼筠卒子幼不得嗣繼捧以季弟襲職失禮諸父宗族多不協克遠素暴悍與弟克順等率兵襲夏州繼捧偵知伏兵以待克遠兵至入伏敗死冬十一月繼捧以銀州變聞

太宗詔令撫綏屬族無使滋亂

太平興國七年春二月月犯井鬼

掩鬼之西南星入于井

史記天官書東井輿鬼雍州之分新唐志夏州東井

之分

按月犯列宿其國主兵夏州將亂乾象先示其咎孰謂天道與人事遠哉書西夏天象始此

三月綏州刺史李克文請詔使諭夏州入覲

自克遠死李氏宗族攜貳綏州刺史西京作坊使

李克文上言繼捧不當承襲恐生變亂請遣使偕

至夏州諭令入覲克文繼捧從父也

按節度使入朝自是常職夏州歷唐五代未嘗

親覲宋初光叡表請不許以其邊方重鎮故弗深求也克文因骨肉微嫌首請詔使其心之為

公為私皆不可知然肇西邊十餘世兵燹之患
貽有宋二百年征討之勞皆此一請致之書以

誌亂始

夏五月繼捧入朝遂獻銀夏綏宥靜五州地

夏州入中國有三路一由綏州歷豐林縣葦子驛

入鄜延東北一由夏州越五百餘里至蘆關出蕃

界入金明境為延州正北一從夏州經四百里至

宥州入洪門由永安城歷萬安鎮抵延州西北此

三處皆土山柏林溪谷相接徑路仄狹駝馬不得

並行故李氏自上世以來未有親覲者克文表至

太宗遣中使持詔命克文權知夏州以西京作坊

使尹憲同知州事召繼捧來京繼捧有難色克文

與詔使並促之不得已率家屬入朝見于崇德殿

太宗大喜賜白金千兩帛千匹錢百萬祖母獨孤

氏獻玉盤一金盤三亦厚賚之繼捧感謝自陳諸

父昆弟多相讎乞納境內五州八縣地

宋史及李氏長編作

銀夏綏宥四州與王氏東都事畧異 畱居京師

按 繼捧既與宗族相讎復為詔使敦迫束身歸

命勢固難已然畱其圖籍任克文輩推擇賢能
權知畱後宋以夏州沙漠或未必爲籍土之謀
乃欲快己私頓遺先業遂使繼遷忿不思難騷
動西陲是肇禍者克文致亂者繼捧也公羊謂
遂者生事之辭書遂獻地與前書尙波于獻地
異

論曰繼捧之祖仁福素鮮大勲系居疎族特以
夏州弒亂將士樂推思召伯者愛及甘棠戴羊
公者碑傳墮泪況思恭遺澤孔長仁福爲其族
子乎顧當梁唐之際自知異姓孤臣功不足以
服朝廷力不足以脇諸鎮假結胡虜冀免除移
遂使邊吏震驚王師薄伐負其隅固要索寵榮
事則成矣如名不正何自是以後以擅知畱後
爲常經以陰援叛鎮爲能事彝超碌碌固無足
稱若彝興兵擾契丹力援國難表附劉漢念切
故君而向背不常緩急難恃無非色厲豈是壯
夫宋與太祖卽西平王爵榮加太尉繼以克獻
忠貞繼筠克肖貢禮無缺漢寇頻摧蓋天下之

西夏書事 卷三 三
統一而反覆之心定矣迨繼捧嗣立不為劉鈞
守土遽效錢俶歸朝豈兄弟鬩牆莫禦其侮耶
何後復合繼遷臣契丹也噫此天所以啟思忠
之後歟

六月定難軍都知蕃落使李繼遷奔地斤澤

繼遷時年二十

王氏東都事畧李氏長編俱作年
十七攷宋史繼遷乾德元年生乾

德盡五年改元開寶開寶盡九年太宗卽位卽以
是年為太平興國元年所云七年實六年也夏國
傳作年
二十自兄繼捧入朝與克文議不協自率故部

居銀州會詔使至護送李氏總麻以上親赴闕始

知五州地盡歸朝廷繼遷不樂內徙與弟繼冲

東都

事畧作
繼忠

親信張浦等謀曰吾祖宗服食茲土逾三

百年父兄子弟列居州郡雄視一方今詔宗族盡

入京師死生束縛之李氏將不血食矣柰何繼冲

曰虎不可離于山魚不可脫于淵請乘夏州不備

殺詔使據綏銀可以得志浦曰不然夏州難起家

庭蕃部觀望克文兼知州事尹憲以重兵屯境上

卒聞事起朝發夕至銀州羌素不習戰何以禦之

吾聞小屈則大伸不若走避漠北安立室家聯絡

豪右捲甲重來未爲晚也繼遷善之詐言乳母死
出葬于郊悉以兵甲置喪車中挈其家族數十人
出奔蕃族地斤澤澤距夏州三百餘里繼遷出其
祖思忠像長編作彝興像誤以示戎人戎人拜泣從者日
衆

按此李氏異宋之始

秋九月權知夏州事李克文入朝

克文性恭順旣權知夏州與尹憲謹飭封埃撫安
蕃族以待朝命太宗遣使召之克文應詔挈其家
屬入京以唐僖宗所賜其祖思恭鉄券及朱書御
札獻太宗宴之崇德殿嘉獎備至授澧州刺史賞
賚無算

綏州刺史李克憲拒命通事舍人袁繼忠諭降之
初克憲恃畧太原功跋扈不順命李繼筠奏罷之
授克文爲刺史及克文移駐夏州太宗以戎人易
亂綏州無主命仍以州事委克憲已詔赴闕克憲
偃蹇不肯行克文請以尹憲兵討之太宗不欲用
武遣袁繼忠持詔往諭克憲謂繼忠曰李氏何負

于朝廷不能以一州相假乎繼忠曰天子以夏州歸順錫以車旗予以銀幣將擢其諸父昆弟並居方面寵榮極矣綏銀僻在羌夷民貧地瘠朝廷召公等入京共享富貴今克文詣闕綏州孤立無援若猶懷顧望一旦兵臨羌人嗜利忘義勢渙心離悔何及耶克憲遲疑久之乃隨繼忠入京授單州刺史與克文並賜第京師

冬十月夏州亂李克文復權知州事

克文入京戎人相率蠢動尹憲發州兵討擊斬首數百級獲牛羊萬計遣使以聞太宗以戎人不忘李氏復命克文權知州事赴鎮以安撫之

十一月李繼捧授彰德軍節度使

自夏州歸順蕃部酋豪樂于內附者凡二百七十餘人族種五萬餘帳十年以來戎人所掠生口牛羊數萬計悉還其主太宗以爲繼捧功特授彰德軍節度并官其諸父克信等十二人有差嘗宴羣臣于苑中謂繼捧曰汝在夏州以何道制諸部對曰戎人鷙悍但羈縻而已非能制也

西夏書事 卷三
十二月李繼遷攻夏州

繼遷聞戎人不靖自地斤澤率衆攻夏州尹憲使請濟師太宗詔引進使梁迥領兵往護銀夏諸州事繼遷聞之退

按此繼遷構兵之始

太平興國八年春三月繼遷入貢內侍秦翰賫敕招之不聽

繼遷聞繼捧等俱受恩命遣所部詣麟州貢馬及橐駝等物奉表言世澤長存祖功未泯人心思舊

蕃部樂推不望通顯皇朝但假餘生戎落克遂肯構肯堂之志常爲不侵不叛之臣云云太宗使秦翰賫敕諭曰朕恭迓天庥懋昭皇極山陬海澨盡一車書日照月臨罔非臣庶爾河西李氏世分旄鉞久任邊疆忠節著于前朝豐功彰于昭代屬茲家庭多難幾化參商幸逢恩詔曲全無虧棣萼業經同族共列王朝何忍一夫遠居荒俗况夷落之內或有跳梁親近之間豈無煽動敢行旅拒難追天誅不特宗祀忽焉抑且身名兩敗細維善後合

念歸誠寵秩有加不失當躬富貴恩榮勿替永貽
奕世箕裘禍福分途從違早計繼遷留翰宿帳中
出入無疑間翰思手刃之不得乃還

夏五月戰于葭蘆川不克

繼遷數寇河西銀夏諸州無寧日太宗令銀夏綏

宥都巡檢使田欽祚與西上閣門副使袁繼忠宋史

繼忠傳奉詔與田仁朗率兵定河西諸州大破西

人于葭蘆川而田仁朗傳九年命仁朗率兵巡銀

夏歲餘召還不載破葭蘆川事且太平興

國無九年二傳疑誤茲從荆嗣傳敘之率兵巡

護繼遷從榻柞嶺引眾拒之戰于葭蘆川不勝棄

鎧甲走

秋九月犯三岔口又敗

繼遷聞田欽祚袁繼忠屯兵三岔控扼夏州要害

潛率眾攻之不勝退入狐貉谷欽祚等出萬井口

逐之繼遷請戰麾眾圍雄武軍千人于後繼忠命

龍衛指揮荆嗣往援列陣格鬪繼遷始却失人馬

七百餘已欽祚軍還依山為營繼遷亦寨其下欽
祚與嗣募勁卒五十人乘夜縱火擊之繼遷不及
備營柵悉燬軍士死者千餘人

冬十二月以西戎兵攻宥州

初太宗詔綏銀夏等州官吏招引沒界外民歸業
繼遷見部下攜貳謂張浦曰我宗社久墟蕃衆飢
敝今中國以財粟招撫流民親離衆散殆不可支
浦曰宋兵遍駐銀夏勢難與爭宥州富庶恃橫山
爲界若誘諸部併力圖之扼險觀變亦克復之策
也繼遷乃誘西戎衆合二萬人攻宥州巡檢使李
詢率所部蕃漢卒擊走之

按繼遷兵力未足而使戎落之衆悉爲己用是

弱能假強寡能假衆也書以著其始大之漸

西夏書事卷四

青浦 吳廣成西齋纂

雍熙元年繼遷匿地斤澤夏五月党項哱嵬族請附
繼遷攻宥州不勝仍駐地斤澤地斤善水草便畜
牧生聚漸衆令弟繼冲煽誘諸蕃哱嵬酋領魔病
人七崖素與南山諸族結黨爲亂率其所部請降
繼遷遣張浦往受之

秋七月掠王庭鎮

鎮在夏州西北蕃部所聚繼遷引衆襲之俘擄萬

計尹憲自夏州赴援不及

九月知夏州尹憲都巡檢使曹光實襲破地斤澤繼遷棄母妻走

繼遷集眾萬餘令張浦李大信等四出俶擾蕃漢苦之尹憲與曹光實計曰地斤四面沙磧兵難驟

進潛使人偵知所在于是月

王氏東都事畧獲繼遷母妻不詳年月宋

史夏國傳繫此事于太平興國八年太宗紀則在雍熙元年傳紀不合又紀及實錄皆載于是年十月庚寅考王氏長編云蓋據奏發精騎數千夜襲到之日耳當移見九月今從之之再宿而至大破繼遷眾斬首五百級焚千四百

帳獲牛羊器械萬計繼遷與弟繼冲棄眾走妻與母罔氏皆被獲

按續綱目書知夏州尹憲襲李繼遷破走之議

者謂其擅兵生事違命邀功致有後日銀州之敗然除君之惡惟力是視未可以兵行詭道遽斥之故書襲書破以見宋室未有之捷書棄書走以見繼遷未有之屺也

冬十二月聚兵黃羊平

繼遷既敗懼官軍追襲轉徙無常處而西人以李

氏素著恩德憫其窮蹙稍稍賑給之繼遷因語豪
右曰李氏世有西土今一旦絕之爾等不忘先澤
能從我興復乎衆曰諾相與屯黃羊平平在夏州
北招來蕃衆兵勢復振于是羌豪野利等族皆以
女妻之宋史夏國傳景德元年繼遷卒子德明立
年二十三母曰順成懿孝皇后野利氏攷
帝紀太宗雍熙元年至眞宗景德元年共年二十
是德明生母非此野利氏可知史臣曰蕃俗諸母
衆多不能備
詳職此故也

雍熙二年春二月繼遷誘都巡檢使曹光實殺之

初繼遷棄銀州蕃部拓跋遇入訴本州賦役苛虐

乞移居內地太宗不許遂作亂夏州巡檢梁迴率

兵討破之遇等散居山谷遣人說繼遷曰銀州地

居四塞西接夏綏東鄰麟勝公家先澤未遠若潛

師以來遇以蕃衆濟之城可得也繼遷問計于衆

從弟延信曰地斤之役乃備禦之疎非戰鬪之罪

漠北不足以立室家今遇衆來歸天假之便失此

不圖後悔何及張浦曰時不再來機不可失但曹

光實老將知兵若不誘之離城攻其無備我軍大

創之餘鶴唳風聲難保必勝也于是令弟繼冲糾

合蕃族自與豪酋破丑重遇貴

新唐書党項居雪山者曰破丑氏又

慶州有破丑氏三族

及張浦李大信等赴銀州

宋史夏國傳繼遷等赴夏

州以詐降誘殺曹光實于葭蘆川而光實從子克明傳光實擊敵于葭蘆川戰歿克明時護輜重在

後懼軍亂秘不發喪陽令人西來傳光實命還軍銀州而潛與僕張貴入敵中護光實尸還夫既云

還軍銀州則繼遷給給曹光實云我數奔北勢窘

光實當不在夏州也不能自存公許我降乎因致情欵陳講甥舅之禮

期日會于葭蘆川納節光實信之且欲擅功不與

入謀及期繼遷設伏領數十人近城迎光實光實

令從子克明護輜重在後自從百騎先赴之繼遷

前導北行將至其地忽舉手揮鞭伏兵起殺光實

殲其從騎

按春秋書楚子誘蔡侯般殺之曰誘者惡其誦

也然戰爭之際身居將帥而為人所誘獨無責

乎是時繼遷以詐降之計殺光實雖繼遷之誦

亦光實之愚有以致之不書戰死而書誘殺交

譏之也

西平王勣令海東諸州日其風入

遂入銀州據之自稱定難軍畱後以張浦劉仁謙為

都押牙預署諸州刺史等官

西夏書事 卷四
繼遷旣殺光實假其旗幟襲破銀州獲軍資器械
無算于是蕃族附者日衆李大信等議推繼遷爲
定難節度西平王號令蕃衆張浦曰自夏州入覲
無復尺疆今甫得一州遽爾自尊恐乖衆志宜先
設官授職以定尊卑預署酋豪各領州郡使人自
爲戰則中國疲于備禦我得盡力于西土矣繼遷
曰是我心也遂稱都知蕃落使權知定難軍畱後
以浦仁謙爲左右都押牙李大信破丑重遇貴爲
蕃部指揮使李光祐李光允等爲團練使復署蕃
酋折八軍爲并州刺史折羅遇爲代州刺史崑悉
咩爲麟州刺史折御乜爲豐州刺史弟延信爲行
軍司馬其餘除授有差

三月焚會州城

銀夏夷落散居川谷平時雖各有鞍甲並無魁首
統攝繼遷自得銀州乘勝攻會州直抵城下縱火
焚毀城郭吏民死者千計會州由是淪陷太宗遣
知秦州田仁朗閭門使王侁副使董愿宮苑使李
繼隆馳傳發兵討之并賜勅書與麟府銀夏豐州

及日利月利諸族諭之并力

按

會州地居四塞銀夏有警秦涇援師皆得赴
此爲戰守計今繼遷取之而不能守火毀其城
以絕中國駐兵之所異時銀夏數州失而不復
非職此故耶

進攻三族砦砦主折遇乜以城降遂圍撫寧砦

繼遷連取二州益以強大率兵掠銀州巡屬之未
下者攻河西三族砦三日砦將折遇乜殺監軍使
者與之合繼遷乘勢抵撫寧圍之

按

降者脇服之詞謂敵力强已力屈有以致之
遇乜殺使獻城非力屈比也書以罪之

夏四月扼濁輪川與官軍戰敗績棄銀州走

田仁朗行次綏州請益兵畱月餘聞繼遷兵攻撫
寧喜曰戎人常烏合寇邊勝則進敗則走不可窮
其巢穴今繼遷嘯聚數萬盡銳以攻孤壘撫寧小
而固非浹旬可破我俟其疲以大兵臨之分遣強
弩三百邀其歸路必成擒矣部署以定故示閒暇
縱酒携蒲副將王侁等媒蘖之太宗聞三族陷徵

仁朗還下御史獄劾問請益兵及陷三族狀仁朗對曰綏夏二州兵皆以城守爲詞不依調遣所部千餘人皆曹光實舊卒器甲不完故請益兵三族去綏州遠非元詔所救也臣已定擒繼遷策會詔至不果因言繼遷得羌戎情願優詔懷來或以厚利啖部落酋長令圖之不爾他日大爲邊患太宗特貸死流商州命侁等進兵侁率所部由綏州至濁輪川繼遷撤撫寧圍拒戰喪失五千餘麾下沒邵浪悉訛及兔頭川東西諸族皆破遂領蕃部棄

銀州遁

按戎人烏合厚利可啖當日宋廷之上計中敵情者仁朗一人而已使果用其謀則撫寧一戰應有全功乃王侁小人忌能誤國戰雖倖勝而自濁輪之役繼遷請婚以結強援僞降以歛兵勢寇環州則大合戎類取靈武則先據山川秘計深謀歷久愈熟故銀州之棄塞翁失馬未足爲繼遷憂也

署代州刺史折羅遇戰歿于悉利砦降將折遇乜被

獲

繼遷既敗王侁收復銀州率兵出州北至悉利諸族署代州刺史折羅遇與弟埋乞迎戰敗死侁復由開光谷西趨杏子坪敗保寺保香諸族首領埋九已等兵斬五十七人又破保洗兩族俘三千人降五十五族擒三族砮叛將折遇七誅之于是三族豪酋折八軍等三千餘衆皆遣使獻馬首罪願改圖自效爲國進討

夏州峇伽羅膩等族附繼遷六月內客省使郭守文擊之諸族皆破滅

繼遷濁輪之敗蕃族雖破而本部未潰夏州鹽城鎮峇伽羅膩十四族俱黨項種落繼遷誘之合遂與吳移越移等族結黨應援守文奉詔自三交乘驛趨夏州偕尹憲引兵至鹽城鎮吳移越移四族請降峇伽等不應憲與守文合擊之擒斬千百焚千餘帳銀麟等州諸部一百二十五族合萬六千一百八十九戶皆內附一族砮酋豪折御七窮蹙棄繼遷歸命守文置之部下

宋史尹憲傳憲護夏州兵殺戮三汭醜奴

莊岌伽羅賦十四族及其渠帥雍熙初詔就知夏州攻破李繼遷之衆于地斤澤攷党項傳雍熙二年六月夏州尹憲引兵至鹽城吳移越移等四族來降憲等撫之岌伽羅賦十四族拒命憲等撿斬干計又郭守文傳雍熙二年夏人擾攘詔守文討之破夏州鹽城鎮岌伽羅賦十四族憲傳載在雍熙前

雍熙三年契丹聖宗統和四年春二月繼遷初降于契丹

契丹西境直對夏州党項東山諸部臣事者多李氏自思恭賜姓未嘗外附繼遷見諸部潰散謀于衆曰吾不能克復舊業致茲喪敗兵單力弱勢不得安北方耶律氏方強吾將假其援助以爲後圖

乃遣張浦持重幣至契丹請附契丹主隆緒意未決西南招討使韓德威言河西爲中國右臂向年

府州折氏與銀夏共衡劉漢致大兵援應無功今

李氏來歸國之利也宜從其請契丹主納之遼史西夏

傳初西夏臣宋有年賜姓曰趙聖宗統和四年繼遷叛宋來附遂復姓李攷是時繼遷未賜姓也遼史

按此西夏臣契丹之始李氏自彝殷救晉未嘗

與契丹相通今繼遷稱臣事之書初降以著其去夏就夷之罪

夏四月契丹授定難軍節度使都督夏州諸軍事

契丹主以繼遷效順遣侍中蕭里得持詔授繼遷

定難軍節度銀夏綏宥等州觀察處置等使特進

檢校太師都督夏州諸軍事繼沖為副使

遼史百官志統

和四年置夏州管內蕃落使授李繼遷置四蕃都軍所授李繼沖與聖宗紀及李氏長編異

冬十二月如契丹請婚契丹許之

繼遷既受契丹官兵勢稍振自以五百騎款契丹

境言願婚大國永作藩輔時契丹將耶律盼與宋

戰于泰州不利契丹主欲使繼遷牽制宋兵許以

公主歸之

雍熙四年

契丹統和五年

春二月繼遷侵夏州敗知州安守

忠兵于王庭鎮

繼遷兵掠夏州徘徊不遽進知州事安守忠率眾

三萬擊之至王庭鎮繼遷設伏誘戰大敗守忠兵

追及城門而止

按

書侵是掠境未攻城也春秋兵詭道而勝之

曰敗如隱十年公敗宋師于菅是也繼遷設伏

以致守忠掩而覆之較之薄未陣者其計更詭

西夏書事 卷四
遂圍夏州夏四月麟州援師至乃還

繼遷進兵圍夏州逾兩月不解知麟州韓崇訓領大兵赴援乃退

夏五月李繼捧出爲崇信軍節度使

繼遷數爲邊患有言其悉知朝廷事蓋繼捧泄之乃出之于外并改其從父澧州刺史克文爲博州單州刺史克憲爲道州防禦使並遣之任宋制懲五代藩鎮之弊特制諸州通判凡知府公事必長史通判簽議連書方行時太宗親選常參官爲二

州通判以專郡政

秋八月屯兵黑水河邀擊銀夏綏府都巡檢使石保興兵敗績

繼遷居沙漠逐水草便于攻掠是時屯黑水河側據險自固石保興方巡按罽子砦繼遷以數千人攻之見保興所部不過二千人遽渡河決戰保興伏兵河澌俟半渡擊之繼遷衆亂大敗

冬十一月党項哱兀等族謀殺繼遷不果

繼遷凶忍虐用其屬宥州党項哱兀等族首領都

指揮遇乜布九人謀誅繼遷時繼遷剋期攻銀州會諸族于無定河側遇乜布等以暗箭射之中其鼻創久不愈師期乃緩遇乜布以聞太宗賜敕書安撫之

按此党項異繼遷之始

端拱元年

契丹統和六年

春二月李繼捧遷感德軍節度使

初繼捧出爲崇信節度崇信地狹境偏不得專郡政心怏怏佯上言繼遷凶頑少智朝廷若遣其親信以恩禮招徠之可不煩兵致也太宗用其言徙

陝西路感德軍節度以招繼遷

三月繼遷遣牙校李知白貢于契丹

繼遷以契丹許歸公主逾年不見真命遣知白表獻請之

按此李氏事契丹之始書貢誌始且備事也

夏五月繼捧復爲定難軍節度使賜姓名趙保忠

朝廷數以勅書諭繼遷及同叛蕃部繼遷佯遣都押牙張浦詣知環州程德元所陳歸順意然終不出降侵擾益甚諸將用兵皆無功宰相趙普言繼

捧所鎮隨州與繼遷聲問遼遠不若委以銀夏故地令圖之太宗因召赴闕賜姓名親書金花五色賤賜之授夏州刺史充定難軍節度使及銀夏綏宥靜等州觀察處置押蕃落等使賜黃金千兩銀器萬兩錦綵二千匹并賜所管五州錢帛芻粟田園保忠辭曰太宗宴之長春殿賜襲衣玉帶銀鞍馬及副馬百匹謂之曰若繼遷歸欵當授以官也保忠荐內殿崇班張繼能材武乞爲副乃命繼能同經理西事遣都虞候王杲領兵千人護送赴鎮

杲還保忠贖以方物杲不受

畢氏續資治通鑑于雍熙元年九月知夏

州尹憲襲破李繼遷下卽云于是賜李繼捧姓名趙保忠授夏州刺史定難節度以討繼遷至是年五月復敘之殊爲舛

張溥曰繼捧懦而不制繼復今從宋史太宗紀

遷狡而得衆彼惟爲昆弟諸父所怨祈留京師乃令其歸招繼遷無論繼遷不肯下反失一繼捧矣

冬十二月趙保忠言繼遷降

保忠至鎮數月上言繼遷已悔過歸誠乞賜官職安之

按繼遷實未請降保忠妄奏以示已功誑君固

位其罪大矣

授銀州刺史充洛苑使不受

太宗允保忠請授繼遷官

畢氏續資治通鑑作銀州刺史西南巡檢使與

宋史夏國傳異繼遷不受

按宋信保忠之言授繼遷官而繼遷未降肯遽

受命耶宋于此猶不悟前言之妄真為保忠所

愚矣

端拱二年

契丹統和七年

春正月繼遷上表契丹請與繼捧

通好不許

繼遷自言與兄繼捧有怨乞與和好契丹主知其

非誠不許

三月貢于契丹契丹以義成公主嫁之

契丹主封王子帳節度耶律襄女為義成公主下

嫁繼遷賜馬三千匹

宋史夏國傳云雍熙三年契丹以義成公主嫁李繼遷與

遼史西夏傳不合

夏四月趙保忠言降宥州御泥布囉樹等族加特進

同中書門下平章事

保忠表言臣遵詔市馬三百匹宥州党項御泥布

囉樹二族党附繼遷不肯賣馬臣領兵掩殺三百餘人擒百餘人其族卽降太宗獎諭之加保忠特進同中書門下平章事

按特進同中書門下平章事宰衡職也保忠空言得之宋君臣不察授之書以交譏也

秋八月趙保忠言夏州馬生二駒

在州民程真家保忠以聞

按馬兵象也繼遷寇勢方張二駒之生天示之兆保忠藉以獻瑞妄矣

九月党項慎州節度使佶移附繼遷其子突厥羅請內屬

初繼捧入朝党項諸族渠帥半請內屬青岡嶺三角城龍馬川兀泥中族大首領佶移首先歸附授慎州節度繼遷知佶移爲大族使張浦等數誘之遂復叛降其長子突厥羅率千餘帳使人至府州折御卿軍前請內屬御卿以聞

附劉渙西行記賀蘭山西北回鶻麼囉王子邈拏王子部落甚盛向無統屬端拱中李繼遷破

滅之其地遂成荒磧攻宋史回鶻傳端拱二年
九月麼囉王子邈拏王子及回鶻都督石仁政
越黜黃水州巡檢四族來貢宋賜以錦袍銀帶
不言繼遷攻滅疑記有誤

冬十月攻熟倉族首領哱唼出兵擊之走還

熟倉會州蕃族首領哱唼素惡繼遷繼遷以兵攻
之哱唼合來離諸族兵掩擊繼遷不勝走還

十二月掠西蕃貢使于橐駝口

靈州橐駝口夏州入中國要路諸蕃由此貢馬京

師繼遷兵扼之不得達環州右班都知周仁美率
騎士赴援繼遷兵乃退

淳化元年

契丹統和八年

春三月繼遷貢于契丹

初繼遷流離沙磧雖臣事契丹貢不成禮及契丹
妻以公主羌部懾服輸牲畜者日衆繼遷遣使如
契丹謝獻良馬二十匹粗馬二百匹駝一百頭錦
綺三百匹織成錦被褥五合菹蓉砮石并鹽一千
斤沙狐皮一千張兔鶻五隻犬子十隻自後每歲
八節貢獻

夏四月趙保忠言破繼遷于安慶澤繼遷中流矢走
繼遷駐兵磧中安慶澤數與沿邊熟戶搆難疆吏
以聞保忠上言遣使諭之不聽已將兵討擊繼遷
拒戰不勝中流矢遁去

冬十月攻夏州趙保忠乞濟師

繼遷謀取夏州遣破丑重遇貴等至州詐降謂繼
遷創甚不能軍保忠信之不設備繼遷陰合諸族
渠帥突攻州城保忠出兵拒戰重遇貴等從中起
保忠僅以身免遣使上表乞援

冬十一月獻捷契丹

繼遷攻夏州月餘不能破休兵王庭鎮遣張浦至
契丹以大敗宋軍告

十二月契丹封繼遷爲夏國王

時契丹敗于徐河大將耶律休哥創甚國中奪氣
遣使促繼遷進兵加以王封令益困中國

宋史夏國傳雍

熙三年契丹封繼遷夏國王與遼史聖宗紀異

張齊賢曰契丹與中國

爲難慮繼遷感中國之恩斷右臂之勢署王爵以
縻之遣戎使以鎮之王爵至則刺史之命輕矣戎

西夏書事 卷四
使至則動靜皆伺之向背之心異矣夫夏國王之稱虛名也而在契丹命之于彼國無損于中國爲敵其謀不甚深哉

按此李氏稱夏國王之始書契丹封惡其煽亂也

附遼史聖宗紀及西夏傳統和八年十二月李繼遷下宋麟鄜等州遣使來告攷是時繼遷未得銀夏焉能越取麟鄜宋史紀傳並不載

西夏書事卷四終

